

Na osnovu člana 16. stav 4. Zakona o Vladi Zeničko-dobojskog kantona – Prečišćeni tekst („Službene novine Zeničko-dobojskog kantona“, broj: 7/10), na prijedlog Ministarstva unutrašnjih poslova, Vlada Zeničko-dobojskog kantona, na 116. sjednici održanoj dana 02.11.2017. godine, d o n o s i

ZAKLJUČAK

I.

Utvrđuje se Prijedlog Zakona o plaćama i naknadama policijskih službenika Zeničko-dobojskog kantona.

II.

Prijedlog Zakona iz tačke I ovog Zaključka se upućuje u dalju skupštinsku proceduru po skraćenom postupku.

III.

Zaključak stupa na snagu danom donošenja.

Broj: 02-02-15062/17.

Datum, 02.11.2017. godine

Z e n i c a

PREMIJER

Miralem Galijašević

DOSTAVLJENO:

1x Ministarstvo unutrašnjih poslova,

1x Stručna služba Skupštine,

1x a/a.

Na osnovu člana 37. stav 1. tačka f) Ustava Zeničko – dobojskog kantona, Skupština Zeničko – dobojskog kantona na _____sjednici održanoj _____2017. godine, d o n o s i:

Z A K O N
O PLAĆAMA I NAKNADAMA POLICIJSKIH SLUŽBENIKA
ZENIČKO-DOBOJSKOG KANTONA

DIO PRVI - OSNOVNE ODREDBE

Član 1.
(Predmet Zakona)

Ovim zakonom uređuju se plaće, platni razredi i koeficijenti za platne razrede, naknade kao i druga pitanja koja se odnose na primanja policijskih službenika Ministarstva unutrašnjih poslova Zeničko-dobojskog kantona (u daljem tekstu: Ministarstvo).

Član 2.
(Definicije pojmova korištenih u Zakonu)

Pojmovi korišteni u ovom zakonu imaju sljedeće značenje:

- a) „policijski službenik“, je policijski službenik zaposlen u Upravi policije Ministarstva;
- b) „radno mjesto“ je pozicija na koju se raspoređuje policijski službenik utvrđena Pravilnikom o unutrašnjoj organizaciji Ministarstva unutrašnjih poslova Zeničko-dobojskog kantona (u daljem tekstu: Pravilnik o unutrašnjoj organizaciji);
- c) „osnovica za obračun plaće“ predstavlja novčani iznos u konvertibilnim markama (u daljem tekstu: KM) koji se koristi za određivanje osnovne plaće;
- d) „platni razred“ predstavlja razvrstavanje radnih mjesta prema činu, utvrđenih u Pravilniku o unutrašnjoj organizaciji, radi određivanja iznosa osnovne plaće policijskog službenika;
- e) „koeficijent“ predstavlja brojčanu vrijednost koja se iskazuje arapskim brojevima za svaku poziciju radnog mjesta koje je razvrstano u platne razrede Ministarstva za utvrđivanje visine osnovne plaće;
- f) "puno radno vrijeme policijskog službenika" je 40 sati sedmično;
- g) „noćni rad“ je rad između 22 sata uvečer i 07 sati ujutro;
- h) „prekovremeni rad“ je rad duži od punog radnog vremena, utvrđen Zakonom o policijskim službenicima Zeničko-dobojskog kantona-Prečišćeni tekst („Službene novine Zeničko-dobojskog kantona" broj: 4/14, u daljem tekstu: Zakon o policijskim službenicima).

Član 3.
(Finansijska sredstva)

Finansijska sredstva za plaće, naknade i druga primanja policijskih službenika predviđena ovim zakonom planiraju se i osiguravaju se u Budžetu Zeničko-dobojskog kantona (u daljem tekstu: Budžet Kantona).

Član 4.
(Načela)

Pri određivanju iznosa plaće i naknada za policijske službenike poštivat će se sljedeća načela:

- a) isti koeficijent za isti čin policijskog službenika;

- b) transparentnost: prilikom objavljivanja javnog konkursa ili oglasa za popunu slobodnih radnih mjesta policijskog službenika obavezno se objavljuje podatak o pripadajućoj osnovnoj neto plaći za oglašena radna mjesta.
- c) fiskalna odgovornost: u skladu sa ovim načelom utvrđivanje i isplata bruto plaće i naknade korisniku prava koje tretira ovaj Zakon na osnovu utvrđene osnovice može se vršiti samo do visine planiranih sredstava u budžetu za te namjene.

DIO DRUGI - PLAĆE I DODACI

Član 5. (Bruto i neto plaće)

- (1) Plaća policijskog službenika utvrđuje se u bruto i neto iznosu.
- (2) Plaća u bruto iznosu obuhvata neto plaću, poreze i doprinose.

Član 6. (Osnovna plaća)

(1) Osnovnu plaću policijskog službenika određuje osnovica iz člana 8. ovog zakona pomnožena sa koeficijentom platnog razreda iz člana 9. ovog zakona i iznos povećanja ostvaren po osnovu radnog staža iz člana 7. stav (3) ovog zakona.

(2) Osnovna plaća obračunava se i iskazuje mjesečno za puno radno vrijeme, prema radnom mjestu i odgovarajućem platnom razredu.

(3) Osnovna plaća policijskog službenika ne može biti manja od 70% od prosječne neto plaće isplaćene u Federaciji Bosne i Hercegovine (u daljem tekstu: Federacija) prema posljednjem objavljenom statističkom podatku.

(4) U slučaju da množenjem utvrđene osnovice i pripadajućeg koeficijenta osnovna plaća iznosi manje od 70% od prosječne plaće iz stava (3) ovog člana, policijskom službeniku će se isplatiti plaća u iznosu iz stava (3) ovog člana.

(5) Ukoliko policijski službenik radi sa nepunim radnim vremenom, u skladu sa posebnim zakonom ili drugim propisom, plaća će se odrediti srazmjerno vremenu provedenom na radu.

Član 7. (Plaća i dodatak na plaću)

(1) Plaća policijskog službenika veže se uz njegov čin.

(2) Sastavni dio plaće policijskog službenika čini osnovna plaća iz člana 6. stav (1) ovog zakona, dodatak na plaću iz člana 10. ovog zakona i naknada za prekovremeni rad, rad u neradne dane, noćni rad i rad u dane državnih praznika iz člana 17. ovog zakona.

(3) Plaća iz stava (2) ovog člana povećava se za 0,5% za svaku punu godinu radnog staža, s tim da ukupno povećanje po ovom osnovu ne može biti veće od 20%.

Član 8. (Način utvrđivanja osnovice za obračun plaće)

(1) Visina osnovice za obračun plaće utvrđuje se na osnovu najniže neto satnice dogovorene između Vlade Kantona i sindikata na način da se najniža neto satnica množi sa fondom radnih sati u mjesecu.

(2) Osnovica iz stava (1) ovog člana za obračun plaće utvrđuje se prije donošenja Budžeta Kantona za narednu fiskalnu godinu, a primjenjuje se od 01. januara za svaku narednu godinu koja se usklađuje sa Zakonom o budžetu, odnosno sa raspoloživim sredstvima za potrebe iz člana 3. ovog zakona.

(3) Ukoliko Vlada Kantona i sindikat ne dogovore osnovicu iz stava (1) ovog člana, ranije dogovorena osnovica ostaje na snazi do dogovora Vlade Kantona i sindikata, a najduže 90 dana.

Član 9. **(Platni razredi, činovi i koeficijenti za policijske službenike)**

Koeficijent za obračun plaće policijskog službenika utvrđuje se prema platnom razredu koji je vezan za čin i to:

PLATNI RAZRED	ČINOVI	KOEFICIJENTI
I	generalni inspektor policije	6,95
II	glavni inspektor	5,90
III	samostalni inspektor	4,90
IV	viši inspektor	4,30
V	inspektor	4,00
VI	mlađi inspektor	3,60
VII	stariji narednik	3,30
VIII	narednik	3,10
IX	stariji policajac	2,90
X	policajac	2,70

Član 10. **(Poseban dodatak na plaću)**

(1) Policijski službenik ima pravo na poseban dodatak na plaću u iznosu do 30% od osnovne plaće policijskog službenika, bez dijela plaće po osnovu radnog staža iz člana 7. stav (3) ovog zakona.

(2) Policijski službenik raspoređen na poslove i zadatke u Specijalnoj policijskoj jedinici ima pravo na poseban dodatak na plaću u iznosu do 40% osnovne plaće policijskog službenika, bez dijela plaće po osnovu radnog staža iz člana 7. stav (3) ovog zakona.

(3) Dodatak iz stava (1) i (2) ovog člana utvrđuje zavisno od rizika, odgovornosti, složenosti ili posebnih radnih uslova na određenim radnim mjestima ministar Ministarstva (u daljem tekstu: ministar), na prijedlog policijskog komesara Ministarstva (u daljem tekstu: policijski komesar).

(4) Uz dodatak iz stava (1) ovog člana u posebnim okolnostima ministar može na prijedlog policijskog komesara utvrditi veći trajni dodatak za pojedina radna mjesta u iznosu 10% od osnovne plaće policijskog službenika.

Član 11. **(Dodatak za izvanredne radne rezultate)**

(1) Na osnovu izuzetnih i objektivno ocijenjenih radnih rezultata policijskog službenika, ministar na prijedlog policijskog komesara može odlučiti o jednokratnom dodatku na plaću tom službeniku u iznosu do 30% od osnovne plaće.

(2) Dodatak iz stava (1) ovog člana može se isplatiti policijskom službeniku dva puta u toku jedne kalendarske godine.

(3) Odluka o isplati dodatka iz stava (1) ovog člana objavljuje se na oglasnoj ploči Ministarstva.

DIO TREĆI - OBRAČUN I ISPLATA PLAĆE

Član 12. (Način obračuna i isplate plaće)

(1) Plaća policijskog službenika se obračunava za jedan mjesec unatrag, a isplaćuje za prethodni mjesec u skladu sa Zakonom o radu i Zakonom o izvršavanju budžeta Kantona.

(2) Plaća iz stava (1) ovog člana utvrđuje se rješenjem koje donosi ministar.

(3) Rješenje iz stava (2) ovog člana sadrži lične podatke policijskog službenika, čin, platni razred i sve elemente koji su uzeti u obzir za utvrđivanje visine plaće.

(4) Podaci o plaćama policijskih službenika su javni.

DIO ČETVRTI – NAKNADE

Član 13. (Druge vrste naknada)

Policijski službenik ima pravo na naknade utvrđene u odredbama člana 14. do 29. ovog zakona.

Član 14. (Naknada zbog privremene spriječenosti za rad)

(1) Policijski službenik ima pravo na naknadu plaće za vrijeme privremene spriječenosti za rad (bolovanje) do 42 kalendarska dana u visini njegove neto plaće iz prethodnog mjeseca.

(2) Naknada plaće za bolovanje preko 42 dana iz stava (1) ovog člana ostvaruje se po propisu Kantona kojim se uređuje naknada za ovo bolovanje, s tim da razliku do pune plaće isplaćuje Ministarstvo u kojem se policijski službenik nalazi u radnom odnosu.

Član 15. (Naknada za porodijski dopust)

Policijski službenik za vrijeme porodijskog dopusta ima pravo na naknadu plaće prema propisima Kantona kojim se uređuje ova oblast, prema mjestu uplate doprinosa s tim da razliku do visine pune plaće uplaćuje Ministarstvo u kojem se policijski službenik nalazi u radnom odnosu.

Član 16. (Naknada za slučaj teške bolesti i invalidnosti)

(1) U slučaju nastanka teške bolesti i invalidnosti policijskog službenika ili člana njegove uže porodice, isplaćuje se jednokratna novčana pomoć u visini od dvije prosječne neto plaće isplaćene u Federaciji Bosne i Hercegovine prema posljednjem objavljenom statističkom podatku.

Član 17. (Naknada za prekovremeni rad, rad u neradne dane, noćni rad i rad u dane državnih praznika)

(1) U slučaju prekovremenog rada, noćnog rada , rada u dane sedmičnog odmora, i rada u dane državnih praznika, policijski službenik ima pravo na naknadu osnovne plaće srazmjerno vremenu trajanja tog rada, uvećanu za:

(a) prekovremeni rad:

- 40% ukoliko je prekovremeni rad bio u periodu između 22,00 i 07,00 sati;

- 30% ukoliko je prekovremeni rad bio u periodu između 07,00 i 22,00 sati;
 - (b) noćni rad 30%;
 - (c) rad u dane sedmičnog odmora 20%;
 - (d) rad u dane državnih praznika 50%.
- (2) Obračun naknade iz stava (1) ovog člana vrši se od osnovne plaće bez dijela plaće po osnovu radnog staža.
- (3) Policijski službenik čiji je raspored rada organizovan u turnusima-smjenama, nema pravo na naknadu za redovan rad u dane vikenda (subota i nedjelja) izuzev naknade za rad u dane državnih praznika i za noćni rad.
- (4) U prekovremeni rad ne ulazi noćni rad.

Član 18. **(Naknada za privremeni interni premještaj)**

- (1) Policijski službenik koji je premješten na drugo radno mjesto koje je 70 km ili više udaljeno od njegovog trenutnog radnog mjesta ima pravo da uz osnovnu plaću koja je određena u skladu sa članom 6. stav (1) ovog zakona i pravo na naknadu za privremeni interni premještaj, koja se sastoji od:
- a) naknade troškova za odvojeni život i
 - b) naknade za odgovarajući smještaj.
- (2) Pravo na naknadu iz stava (1) ovog člana ne ostvaruje policijski službenik koji je premješten po ličnom zahtjevu, kao i policijski službenik koji je prvi put raspoređen na radno mjesto.

Član 19. **(Otpremnina u slučaju otpusta zbog viška policijskih službenika)**

- (1) U slučaju otpusta zbog viška policijskih službenika u skladu sa zakonom, otpušteni policijski službenik koji ima do 15 godina penzijskog staža ima pravo na otpremninu koja odgovara iznosu plaće koju je primio u vrijeme kada je proglašen viškom, obračunate za period od pet mjeseci.
- (2) Otpremnina iz stava (1) ovog člana iznosi 10 mjesečnih plaća za policijske službenike koji imaju preko 15 godina penzijskog staža kao policijski službenici.

Član 20. **(Naknada za troškove sahrane i za slučaj smrti)**

- (1) Policijski službenik koji u toku vršenja dužnosti izgubi život, sahranjuje se na mjestu koje odrede članovi njegove uže porodice na trošak Ministarstva, koji se sastoji od sljedećeg:
- a) prijevoz posmrtnih ostataka na mjesto ukopa;
 - b) putne troškove za dva prateća lica;
 - c) trošak za grobnicu, ukoliko nije već osigurana na drugi način;
 - d) druge uobičajne troškove u iznosu koji određuje Ministarstvo.
- (2) Porodica koju je preminuli policijski službenik iz stava (1) ovog člana izdržavao, ima pravo na jednokratnu finansijsku pomoć u iznosu posljednje neto plaće koju je policijski službenik ostvario uvećane šest puta.
- (3) U slučaju smrti policijskog službenika van vršenja službene dužnosti, porodici policijskog službenika koju je izdržavao, isplaćuju se troškovi sahrane u visini od četiri prosječne neto plaće isplaćene u Federaciji Bosne i Hercegovine prema posljednjem objavljenom statističkom podatku.
- (4) Naknada iz stava (3) ovog člana isplaćuje se i u slučaju smrti člana uže porodice policijskog službenika.

(5) Ukoliko u Ministarstvu rade dva ili više članova porodice, troškovi sahrane iz stava (3) ovog člana isplaćuju se samo jednom zaposlenom članu porodice.

(6) U slučaju smrti roditelja, policijskom službeniku pripada naknada iz stava (3) ovog člana bez obzira da li su živjeli u zajedničkom domaćinstvu.

Član 21.

(Članovi uže porodice)

Članom uže porodice policijskog službenika, u smislu ovog zakona smatraju se:

- a) bračni i vanbračni drug ako žive u zajedničkom domaćinstvu sa policijskim službenikom,
- b) dijete (bračno, vanbračno, usvojeno, pastorče i dijete bez roditelja uzeto na izdržavanje do 18. godine, odnosno do 26. godine života ako se nalazi na redovnom školovanju i nije u radnom odnosu, a djeca nesposobna za rad bez obzira na starosnu dob),
- c) roditelji (otac, majka, očuh, maćeha i usvojitelji) ako žive u zajedničkom domaćinstvu sa policijskim službenikom,
- d) braća i sestre bez roditelja do 18., odnosno do 26. godine života ako se nalaze na redovnom školovanju i nemaju drugih prihoda, već ih policijski službenik stvarno izdržava ili je obaveza njihovog izdržavanja zakonom utvrđena, a ako su nesposobni za rad, bez obzira na dob, pod uvjetom da sa njima živi u zajedničkom domaćinstvu, i
- e) unučad ako nemaju roditelja i žive u zajedničkom domaćinstvu sa policijskim službenikom.

Član 22.

(Pravo na osiguranje od posljedica nesretnog slučaja)

(1) Policijski službenik ima pravo na osiguranje od posljedica nesretnog slučaja s uključenim rizikom od prirodne smrti za vrijeme trajanja radnog odnosa.

(2) Visina osiguranja po ovoj osnovi određuje se prema polisi osiguranja od posljedica nesretnog slučaja, odnosno polisi osiguranja od prirodne smrti.

(3) Ugovor o osiguranju sa odgovarajućom osiguravajućom kućom zaključuje premijer Kantona za sve policijske službenike u Kantonu u skladu sa Kolektivnim ugovorom.

Član 23.

(Naknada za prevoz na posao i sa posla)

(1) Policijskom službeniku kojem nije organizovan službeni prijevoz na posao i sa posla, pripada naknada za troškove prijevoza na posao i sa posla u visini, na način i pod uslovima koji Vlada Kantona utvrdi uredbom iz člana 30. ovog zakona.

(2) Naknada iz stava (1) ovog člana neće se obračunavati za vrijeme odsutnosti sa posla po osnovu službenog puta, bolovanja ili godišnjeg odmora.

Član 24.

(Naknada za ishranu tokom rada)

(1) Policijski službenik ima pravo na naknadu za ishranu u toku rada (topli obrok) samo za dane prisustva na poslu.

(2) Policijski službenici ostvaruju pravo iz stava (1) ovog člana u obliku naknade za ishranu za vrijeme rada (topli obrok) a visina i način ostvarivanja naknade utvrdit će se posebnim aktom Vlade Kantona.

(3) Pravo na naknadu iz stava (1) i (2) ovog člana ne ostvaruje se u slučaju odsustvovanja sa posla po bilo kom opravdanom ili neopravdanom osnovu (službeni put, plaćeno odsustvo, odsustvo zbog bolesti i sl.).

Član 25. (Regres)

(1) Policijski službenik ima pravo na naknadu na ime regresa za korištenje godišnjeg odmora u visini od 50% prosječne neto plaće isplaćene u Federaciji prema posljednjem objavljenom statističkom podatku.

(2) Pravo na regres iz stava (1) ovog člana ima svaki policijski službenik koji u toku tekuće kalendarske godine ima pravo na godišnji odmor.

Član 26. (Otpremnina)

Policijski službenik ima pravo na otpremninu prilikom odlaska u penziju u visini svojih pet ostvarenih prosječnih neto plaća isplaćenih u prethodnih pet mjeseci.

Član 27. (Naknada za službeni put)

(1) Policijski službenik ima pravo na naknadu za troškove službenog putovanja na području Federacije, odnosno Bosne i Hercegovine kao i za putovanje u inostranstvo, na koje se upućuje zbog izvršavanja službenog zadatka.

(2) Visinu i način ostvarivanja naknade iz stava (1) ovog člana utvrđuje Vlada Kantona u skladu sa Kolektivnim ugovorom.

Član 28. (Naknada za odvojeni život od porodice i smještaj u mjestu rada)

Policijski službenik čije je mjesto prebivališta udaljeno više od 70 km od mjesta rada ima pravo na naknadu troškova smještaja u mjestu rada u iznosu i na način koji Vlada Kantona utvrdi za državne službenike i namještenike.

Član 29. (Druge naknade)

Policijski službenik ima pravo i na druge naknade utvrđene Kolektivnim ugovorom.

DIO PETI - DONOŠENJE PODZAKONSKOG PROPISA I RJEŠENJA

Član 30. (Propis o uvjetima i postupku ostvarivanja naknada)

Vlada Kantona će na prijedlog Ministarstva donijeti uredbu o uslovima, kriterijima i načinu ostvarivanja naknada i drugih materijalnih prava utvrđenih ovim zakonom u roku od 60 dana od dana stupanja na snagu ovog zakona.

Član 31. (Donošenje rješenja)

- (1) Naknade i druga materijalna prava predviđena u odredbama članova: 15., 16., 17. stav (1) tačka a), 18., 19., 20., 23., 26. i 28. ovog zakona ostvaruju se donošenjem rješenja.
- (2) Rješenja iz stava (1) ovog člana donosi ministar.

DIO ŠESTI - NADZOR NAD PRIMJENOM OVOG ZAKONA

Član 32. (Nadzor nad primjenom ovog zakona)

Nadzor nad primjenom ovog zakona vrši Ministarstvo unutrašnjih poslova Zeničko-dobojskog kantona i Ministarstvo finansija Zeničko-dobojskog kantona, svako u okviru svojih nadležnosti.

DIO SEDMI - KAZNENE ODREDBE

Član 33. (Kazne za prekršaje)

Novčanom kaznom u iznosu od 500,00 KM do 2.000,00 KM bit će kažnjen za prekršaj ministar ako:

- a) ne odredi plaću policijskom službeniku u skladu sa njegovim činom (član 7. stav (1));
- b) ne odredi dodatak na plaću u skladu sa članom 10. ovog zakona;
- c) ne donese rješenje o plaći (član 12. stav (2));
- d) odredi naknade suprotno članu 14. do 29. ovog zakona;
- e) ako ne donese pravilnik o plaćama i naknadama (član 30.).

DIO OSMI - PRELAZNE I ZAVRŠNE ODREDBE

Član 34. (Usklađivanje Kolektivnog ugovora)

Vlada Kantona i Sindikat dužni su uskladiti odredbe granskog Kolektivnog ugovora sa ovim zakonom u roku od 3 mjeseca od dana stupanja na snagu ovog zakona.

Član 35. (Prelazna odredba o plaćama)

(1) Policijskom službeniku kojem stupanjem na snagu ovog zakona bude u istom činu obračunata niža plaća od one na koju je imao pravo na dan prije stupanja na snagu ovog zakona, dodjeljuje se dodatak jednak razlici ranije plaće i plaće obračunate u skladu sa ovim zakonom, a najduže do 31.12.2017.godine.

(2) Policijskom službeniku sa dodijeljenim činom generalni inspektor policije nakon stupanja na snagu ovog zakona, dodijelit će se dodatak jednak razlici plaće utvrđene za čin generalni inspektor policije prema propisu koji je važio do dana stupanja na snagu ovog zakona i plaće obračunate po ovom zakonu.

(3) Pravo na dodatak iz stava (2) ovog člana pripada policijskom službeniku sve dok razlika u plaći ne bude pokrivena budućim povećanjima njegove osnovne plaće.

Član 36.
(Prestanak primjene odredbi drugih propisa)

- (1) Danom stupanja na snagu ovog zakona prestaju da važe:
- a) Odredbe Zakona o policijskim službenicima koje se odnose na plaće, dodatke na plaću, naknade i ostala materijalna primanja ako su drugačije uređena ovim zakonom;
 - b) Odredbe Uredbe o plaćama, naknadama i drugim materijalnim pravima policijskih službenika Zeničko-dobojskog kantona ("Službene novine Zeničko-dobojskog kantona", broj: 3/08, 10/09, 13/09, 2/10 i 7/10, 3/12, 12/12, 14/12, 5/14, 6/14, 1/15, 3/15 i 5/15), koje se odnose na plaće, naknade i ostala materijalna primanja ako su drugačije uređena ovim zakonom.
- (2) Svi predmeti koji su u postupku rješavanja, rješavaće se u skladu sa propisima koji su važili do donošenja ovog zakona, ako je povoljnije za policijskog službenika.

Član 37.
(Ravnopravnost polova)

Odredbe ovog zakona odnose se podjednako na osobe ženskog i muškog pola, bez obzira na rod imenice upotrijebljene u tekstu zakona.

Član 38.
(Stupanje na snagu)

Ovaj zakon stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: _____
Zenica, _____

Predsjedavajući Skupštine
Zeničko-dobojskog kantona

Jasmin Duvnjak